

**1247-1247- OFP - Acta Capitulum Generalium Montepesulano Celebrati**

In nomine patris et filii et spiritus sancti. Amen.

Acta capituli generalis in Montepesulano  
celebrati anno Domini · M<sup>o</sup> · CC<sup>o</sup> · XLVII<sup>o</sup>

Iste sunt **confirmaciones**.

Confirmamus has constituciones. Nullus audeat instare vel rogare pro beneficiis suis consanguineis obtinendis. et ponatur post illud. nec quibus etc. Et hec habet · iii · capitula.

Item hanc. Ubi dicitur. feria · iia · et · iia · post · lam · addatur. et ieiunamus. Et hec habet · iii · capitula.

Item hanc. Fratres leprosi intra septa sui conventus seorsum ab aliis procurentur. Quod si artitudo illius loci. vel alia causa legitima non permiserit. per prior-em provincialem. ad conventum alium nostri ordinis transferantur. Et hec habet · iii · capitula.

**Approbamus** has constituciones. In constitutionibus ubi dicitur de silencio mense. et ipse taceat. addatur. nullus autem aliorum ibidem loquatur. nisi de neccessariis mense tantum. et hoc per unicam oracionem. breviter et submisce. Et hec habet · ii · capitula.

Item hanc. In constitutionibus ubi dicitur. Anniversarium benefactorum. tertia die post nativitatem eiusdem faciendum est. deleatur. tertia die post nativitatem eiusdem. et ponatur sequenti die post octavas beati Augustini. Anniversarium vero fratrum sequenti die post festum beati Dyonisii. Et hec habet · ii · capitula.

Item hanc. In constitutionibus ubi dicitur. Tres fratres mittantur tantum Parisius de provincia ad studium. addatur · iiiior · autem provincie scilicet Provincia. Lombardia. Anglia. Theutonia; provideant ut semper in conventu aliquo magis ydoneo sit generale studium et sollempne. et ad illum locum quilibet provincialis potestatem habeat mittendi duos fratres ydoneos ad studium. Et hec habet · ii · capitula.

Item hanc. Ubi dicitur. Nullus fiat publicus doctor nisi ad minus theologiam per · iiiior · annos audierit. nec disputet nisi per licenciam prioris provincialis. et diffinitorum capituli provincialis. Et hec habet · ii · capitula.

Item hanc. Ubi dicitur. Itinerantes bis refici possunt. nisi in adventu domini et ieiuniis principalibus ab ecclesia institutis. addatur. et · vi · feriis. Et hec habet · ii · capitula.

Item hanc. Tota ordinacio ecclesiastici officii facta a · iiiior · fratribus provinciarum. vel facienda usque ad annum. communiter per totum ordinem observetur. et si in aliquo discordaverint; sententia magistri teneatur. Et hec habet · ii · capitula.

Item hanc. Ut liber lectionarius tam de tempore quam de festis. quem committimus priori provinciali Francie ordinandum; per totum ordinem universaliter recipiatur. Et hec habet · ii · capitula.

Inchoamus hanc. Quod in anno diffinicionis priorum provincialium. socii eorum assignati a capitulo provinciali. admittantur in diffinicionibus loco eorum. si ipsos contigerit non venire.

Item hanc. In constitutionibus. et a priore provinciali si ei visum fuerit. confirmetur. addatur. conventus autem qui petit confirmacionem electi in priorem. numerum et nomina eligencium scribat provinciali.

Item hanc. Priores provinciales et conventuales et lectores in capitulis provincialibus et generalibus a fratribus suarum provinciarum sive conventuum; nullatenus repetantur.

**Admonemus** fratres singulos et universos et in remissionem peccatorum iniungimus. ut negocia ecclesie. et verbis et factis. tam inter se quam inter alios fideliter foveant. et promoveant. et contraria aliquatinus non attemptent. et caveant diligentissime; ne de factis domini pape obloquantur vel Frederico deposito. in aliquo verbo vel facto auxilium prebere videantur. Si qui vero contra fecerint. volumus quod per priores suos vel visitatores acrius puniantur.

Item. Priores provinciales moneant episcopos ordinis nostri in suis provinciis. ut in vestibus et calceamentis et in aliis quibus in officio episcopali impedimentum non prestatur. se conforment ordini. alioquin fratres eis in socios non concedantur. et dati revocentur ab eis.

Item. Admonemus fratres. ut capitula provincialia a die inchoacionis eorumdem. non protrahantur plus quam capitulum generale.

Item. Quod fratres horas quas dicunt extra chorum. tractim dicant; et distincte. Officium eciam defunctorum. tam in choro. quam extra chorum. devocius quam aliqui consueverunt; persolvatur.

Item. Monemus priores universos. quod constitutionem de vilitate vestium. tam in clericis quam in conversis. et silencio ei inclinacionibus; diligencius faciant observari.

Item. Quod fratres notabiliter iuvenes ad ordinem presbiterii. non faciant promoveri. et non exponant ad confessiones. precipue mulierum. quarum eciam notabilis familiaritas et frequencia ab omnibus fratribus evitetur.

Item. Priores provinciales constitutionem de modo studendi diligenter faciant observari. et licencias sive a magistro vel ab eis. sive ab aliis data in contrarium; revocent secundum quod eis videbitur expedire. et studentibus et aptis ad studium. de consilio diffinitorum capituli provincialis faciant provideri.

Fratres qui a precedenti capitulo generali usque ad istud. venerunt ad curiam contra formam ordinis nostri · vii · dies in pane et aqua ieiunent · vii · missas dicant et totidem disciplinas recipiant. Non sacerdos vero pro missis psalteria. reliqua ut supra. Idem faciant; qui contra statutam formam eos licenciaverunt.

Pro domino papa el statu tocius ecclesie quilibet sacerdos · iii · missas. etc.

In provincia Provincie concedimus tres domos. In provincia Francie · ii · In Polonia · ii · In Dacia · i ·

Absolvimus priores provinciales. Lombardie. Thuscie. Ungarie. Polonie. Grecie.

Item. Volumus quod fratres Lombardos. Tuscos. et Ungaros. propter imminentes guerras. si fuga imminens compulerit fratres ad quos declinaverint. ipsos recipere teneantur et retinere.

Sequens capitulum celebrabitur Parisius.